

共同經課-1 約珥書二章二十一節~二十七節

21 地土啊，莫得驚；著歡喜快樂，因為耶和華行大事。22 田野的走獸啊，莫得驚；因為，曠野的草場發生，樹結伊的果子，無花果樹、葡萄樹亦攏結實。23 錫安的百姓啊，恁著快樂，為耶和華——恁的上帝來歡喜；因為伊用前的雨及時賞賜恁，為著恁落雨水，就是前的雨、後的雨，及以前一樣。24 五穀場欲有麥滿滿；窟中的新酒及油欲滿出來。25 我差到恁中間的大軍隊，就是第一種、第二種、第三種、第四種的草蟲，所食許個年冬，我攏欲還恁。26 恁欲食來知足，亦欲謳唵恁的上帝——耶和華的名。因為伊為著恁行奇妙的事，我的百姓的確永遠無見誚。27 恁就欲知我佇以色列的中間，閣知我是耶和華——恁的上帝；以外無別個。我的百姓的確永遠無見誚。

共同經課-2 詩篇一百二十六篇

1 〔上崎仔的詩。〕耶和華導許個受掠的人倒轉來錫安，彼時咱親像眠夢。2 彼時咱的嘴哈哈笑、咱的舌出大歡喜的聲，外邦中就有人講：耶和華為in行大事！3 耶和華有為咱行大事，咱就歡喜。4 耶和華啊，求你互阮受掠的人倒轉，親像南方的溪水閣流。5 流目屎撒種子者，欲出歡喜的聲收割！6 彼個流目屎帶種子出去者，的確欲帶伊的稻把歡歡喜喜倒來！

共同經課-3 提摩太前書二章一節~七節

1 所以我所勸勉的，第一就是替眾人懇求、祈禱、求恩、祝謝；2 替諸個王及攏總的官府求，互咱凡事敬虔、端莊，通安然恬靜來過日。3 這是好，閣得著接納佇救咱的上帝的面前。4 伊愛眾人得著救，也深知真理。5 因為上帝是一個，上帝及人的中間，中保也是一個，就是做人的基督耶穌；6 伊為著眾人獻本身，做替贖的價錢，有及時證明。7 因為按呢我受設立做宣傳的，做使徒，用信用真實做外邦的教師，我所講是真實無白賊。

共同經課-4 馬太福音六章二十五節~三十三節

25 「所以我給恁講，莫得掛慮恁的生命欲食甚麼，欲飲甚麼；抑是恁的身軀欲穿甚麼，恁的生命豈無卡大佇米糧？也恁的身軀豈無卡大佇衣裳嗎？26 試看天中的飛鳥，無種作，無收成，無積聚佇粟倉，恁的天父也啲飼in。恁豈無比許個卡貴氣嗎？27 恁甚麼人會用掛慮互生命卡長一刻久？28 啥事為著衣裳掛慮啊？試想山裡的百合花怎樣大穰；in無著磨，無紡織。29 若是我給恁講，當所羅門極行伍的時，伊所穿的，毋值著此號花的一蕊！30 今山裡的草今仔日佇啲，明仔日穴佇火爐，上帝互伊穿到按呢，何況恁，小信的人啊！31 所以，莫得掛慮講，阮欲食甚麼？欲飲甚麼？欲穿甚麼？32 因為諸個攏是外邦人所求的。恁的天父也知，諸個攏是恁欠用的。33 獨獨代先求伊的國及伊的義，就諸個物攏欲續互恁。